

ESTD. JULY 1931

Postal Regd. No. MR NE- 1063/2009-11



SIPAI TLANGAU

SIPAI PAWL THUCHAH LEH RAWNGBAWLNA

'I din leh ang u'

Nehemia 2:17

REGD. NO. RN 37326/81 VOLUME 80 NO. 5

May 2011

Home League Congress Open Air Meeting





THE SALVATION ARMY

WILLIAM BOOTH - Founder
SHAW CLIFTON - General
International Headquarters
101 Queen Victoria Street
London EC4V 4EH

COLONEL. LALNGAIHAWMI
Territorial Commander

A MAN Rs. 6

SIPAI TLANGAU

Official Organ of
The Salvation Army, India Eastern Territory
(Regd. No. RN 37326/81)

MAY - 2011

Volume 80 No. 5

Published by The Salvation Army
Territorial Headquarters Post Box - 5, Aizawl
796 001, Mizoram and printed at The Salvation
Army Centenary Press Tuikual 'S' Post Box - 5,
Aizawl 796 001 Mizoram Copy 5000
Editor - Major Chawnghluna

A CHHUNGA THU AWMTE

1. Editorial: Tunlai leh Kohhran
2. Territorial Commander Message.....1
3. Chief Secretary Notes.....2
4. Kan lei hringnun hi Pathian thu thu a ni.....3
Maj. PC Thansanga
5. Mizoram thimna ber leh a chhuahna kawng...4
Maj. Enggina
6. Inpeih a hun e.....5
PC Lianhmingthanga
7. Sual keimaha awm tih chu a nizawk.....6
KT Chianga
8. Maicham mei min kang thianghlitmu.....8
Cherhlunchunga
9. Mei ka zu ve tan.....9
Lalrindiki
10. Chanchin lawrkhawm.....10
11. Ropuinaa kaisang.....12
12. Rawngbawlna report.....14

MISSION STATEMENT

CHHANDAMNA SIPAI PAWL hi Kristian kohhran,
khawvel huapa Chanchin tha hrila thawk a ni.

A thuchah chu Bible ah a innghat a. A rawngbawlna
chu Pathian hmangaihna a tihnun a ni. A hnapi
ber chu Chanchin tha hril leh hleih nei hauh lova,
Isua Krista hminga mihring mamawh puhruk hi a
ni.

editorial :

TUNLAI LEH KOHHRAN



Kan tunlai nunphung hian Salvation Army te pawh
hi min chim nasa ta hle mai a, Salvation Army kalphung
hian khawvel a hnehna aiin khawvel kalphung in Salva-
tion Army a hnehna hi a tam zawk mah awm e. "Sualna
kan chil ang a, Kraws kan chawi kang ang," tih hla neitute
kan ni a, amaherawhchu sualna in min chil zawk tak
avangin Kraws kan chawi kang hlei thei ta lo chu a nih hi
maw le. Eng ang takin nge khawvel thil hian min chim
tawh a, tha anga lang si, tha silo te hian eng chen nge min
hruai tawh le?

Kan tunlai hunah hian rualawhna leh duhamna te
a nasa ta hle a, kan nei tam tial tial a, kan duhamna a zual
zel a, chin lem neilo rualawhna leh duhamna ten min chim
hneh hle a. Chumi bakah chuan lalna leh thuneih chakna
a tuihalna a lian sawt hle bawk. Neih tam lamah kan in
thlau ta hle a, kan In leh lo a ropui hleih hle a, kan ei leh
in a intui hleih a, kan hmel lan dan thlengin a in that hleih
bawk a. Hmasawanna kai ruallo hian loh theih lohva a hrin
chhuah chu nuna in thliar hranna hi a ni. Kan in en dan hi
a chhe zawngin a rawn nghawng a, mihring leh mihring
inkar a hla a, "Mi hausa leh mirethei an awm za a, an zavaia
siamtu chu Lalpa a ni," tih ziak te pawh kan hmu fiah ta
lo hle mai chu a ni hi maw.

Sipai te a huhova kan awm tlanna Corps lam pawh
hi in enfiah ve teh ang, kan hriat hauhlohvin tunlai
hmasawanna hian min hruai lutuk tawh em? THQ leh DHQ
leh Corps a Local Officer te thlengin lalna leh thuneihna
te hi min ti chapotu a ni em? Sipai rethei zawk leh
chhumchhia zawk te ngaihsakloh leh hmuh hniam te kan
nei em? miten min hmuhsan phut rilruk tlatna te hian
keimahni theuh ah hian hmun a luah thuk viau em?
Rawngbawltute pawh hi miten rawngbawltu angin min
hmu em? lalna leh thuneihna vawngtu angin em ni min
hmuh? Keite chuan a zia a thlak thin an ti a, Salvation
Army kalphung leh zia chu khawvel nun dan leh duh dan
milin a danglam tur a nilova, Salvation Army kalhmang
leh duh dan milin kan chenna khawvel hi kan tidanglam
zawk tur a ni dawn lawm ni.

A LAIAH ISUA

Territorial Commander Message



*Colonel Lalngaihawmi
Territorial Commander*

Sipai zawng zawng te Pathian hmingin chibai ka han buk a che u. Mahni hmun theuh ah Pathian leh sipai pawl tan rinawm takin in awm zel ang tih ka ring e. In hnathawhna kawng hrang hrangah ‘A laiah Isua’ dah chung zel a hun hmang turin duhsakna ka han hlan a che u.

Bible kan chhiar chuan Genesis atanga Thupuan thleng hian Bible in laipui leh thukphuma a hman chu Isua Krista a ni tih kan hre awm e. Thuthlung Hlui huna an hnam hruaitu lungthu pathum te chu, Lal te, Puithiam te, Zawlnei te an ni a. Thuthlung Thar hunah chuan Isua Krista a lo lan tak avangin heng lungthu pathumte hian kawng an lo kian a, Isua chu kawng laiah an kaltir ta a. Isua Krista ah chuan lal leh zawlnei leh puithiam hna a famkimin a awm ta a ni.

Chutichuan Bible chuan lei leh van huapin hmun laili berah Isua Krista hi a dintir a, “A laiah Isua” tih thu ang leh Hla ah te hial an lo phuah tak ang khan. Kan Lal Isuan ke a per rualin lei leh van hi a lam kual a ni tiin kan sawi thei hial awm e. Kan Bible thuchah laipui ber pawh chhandamna a ni a, thildang zawng zawng te hi chu a sira mi vek an ni. Hmanlai Tirkhohte pawh khan humhim an tum ber chu Lal Isua leh a zirtirna hi a ni. chumi pela kal te reng reng chu “Anchhedawngin awm rawh se” an lo ti hmak mai a nih kha. (Gal. 1 : 9)

Isua Krista zirtirna ai a dah pawimawh zawk neih leh thildang uar zawk neitu te chu, Pathian neitute nilo anga sawi an ni a, chutiang mi te chu In a thlen tir pawh an lo phallo hial a ni.

Tunlai kan Zoram khawvel hi han thlir ila, Lal Isua aia sawi uar zawk nei kan kat nuk tawh mai lo maw, mimal leh pawl ho zirtirna ah te hian ‘A laiah Isua’ kan hmang em? A laiah mahni in dah hi a awl khawp mai. Mizote hi chan chin tha avanga ding chhuak kan ni a, midangte tana biak huphurhawm khawpin awm lo ila, Chopona lakah pawh in veng ila. Chapona hi tualchhung indona chawk chhuaktu a ni a, inngaihtlawmna hi indo tirehtu a ni a, inngaihsak tawmna hi inremna siamtu a ni bawk. ‘I ram lo thleng rawh se’ tiin kan tawngtai thin a, Pathian ramah chuan Pathian duh zawng a lal ber a, ro a rel a, miten an zawm thin.

Pathian ram chu a thianghlim a, inhmangaihna leh inlaintawmna ram, Lalpa duh zawnga ro relna ram a ni a. Kan Lalpa chuan, in bumna te, inthamna te, fin khereka indawrna te, mahni hmasialna leh duhamna te, retheite hnuachhiaha te, inthahna te, uirena te, pawngsual leh hleprukna te, dawtsawi leh mipat hmeichhiat duhdah taka hmanna te, sum hmuhna tur a nih dawn phawt chuan engmah tihreh lohna te, thuneihna leh Lalna duh vanga thil diklo taka tih duhna te hi a huat zawng tak a ni a. Hengte hian kan ram ah hmasawn zawngin bu a khuar mek a nih chuan, sipai te hian kan hmelma a ni tih hriain i do ang u. Chuvangin khawvela Pathian ram din hi Lal Isua thupui ber leh a lokal chhan bulpui ber leh a nunna a pek zawh vekna a nih avangin tawngtaina atan a hmangtute ngei hi a tak a pholanna hmanrua ah i tang ang u..

Khawvel a kan damchhung tinuamtu pakhat chu mite ngaihsak nih hi a ni a. Midangte ngaihsakna nei hauhlo te hi khawvela harsatna nei lian ber te an ni a. Nun hi inngaihsak tawmna a ni a, midang ngaihsak ngailo kan nih chuan mahni chauhua thliarkar a awm ang kan ni ang. Pathianin Abraham a koh khan malsawmna tam tak vur a tiam a, chumi kawng chu a hlen chhuah theih nan midangte tan malsawmna thlentua ni phawt tur a ni tih a hrih ang khan, keini pawh hian, “A laiah Isua” kan thilung hmun laili berah Isua Krista dintir chungin kan hun midangte tan i hmang thin ang u.

CHIEF SECRETARY NOTES

Territorial Commander: March 2011 thla laihawl ah khan International Moral Social Council London-a neih ah member a nih angin a kal a, hapta hnih chungh territory a chhuahsan hnuin dam takin a lo kir leh a, report benglut tak tak amah lo lawmtute hnenah a pe a, kan lawm hle.

Sipai Pawl hmasawn zel: West Africa huam chungh Ghana ramri a Togo ramah chuan a ram miten anmahni duhna ngeia Chhandamna Sipai Pawl an din chu Intenational Management Council (IMC) in a recommend angin General Shaw Clifton chuan official in a pawm ta a, hei hi Sipai Pawlin ram 124-a rawng a bawl na a ni ta a ni.

Middle East Region: Kum 2008-a rawngbawl na tan chuah ni mahse, Kuwait ram leh UAE te a sipai pawl rawngblawna chuan hma a sawn em em a. Oman leh Bharain lama rawngbawl na te chu he Middle East Region-a behtel tir tum a ni bawk. Heng bakah hian kumin 2011-a hnathawhna hmun hawn thar Turks & Caicos Island leh Solomon Island ram a rawngbawl na te chuan rah duhawm tak chhuahin hma an sawn tha hle.

Ration Sem: Kum kalta a ruah tui tlak dan dik tawklah avanga Kenya ram Makueni District-a chengten tam nasa taka an tuar chu, an ram roreltu ngenna angin Sipai Pawl chuan chungh kaw 288 te tan hapta hnih chungh ration pe in a enkawl.

Lirngching tuartu: New Zealand leh Japan ramah tunlai hian Chhandamna Sipai Pawl anmahni ram ami leh IHQ chuan tanpuina leh chhawmdawl na hna nasa taka thawkin an kalpui mek a, heng ram te a Sipai Pawl Biakin te chu in leh lo neilo ten chen nan an hmang a, a thente chu

damlo enkawl nan te a hman an niin, ram tam takin tuartute tan hian Sipai Pawl kaltlangin thilpek an pe a ni.

Divisional Youth Secretary's Meeting: India Eastern Territory huam chunghanga Division hrang hrang a naupang leh thalai lam hotu DYS te in hmuh khawmna hun hman a ni a, DYS te an lo kal tha hle a, thil pawimawh chi hrang hrang te an zirhovin hun an hmang a ni.

Women's Ministry: Ni 17th March 2011 dar 3:00pm khan Territorial Home League Congress hlawhtling taka neih zawh tak chu Review neih a ni a, THQ Officer te leh Sub Committee peng hrang hrang te nen chaw eiho a ni nghal bawk. Ni 24th March 2011 ah THQ a women Officer pali te chu Lt. Col. Kawlramthangi TSWM hovin Officer Training College ah an sawmna angin Cadet te hnenah Lecture chi hrang hrang pe in an kal.

Naupang Sipai hlabu siam tur: Naupang pual bika hman tur hlabu naupang sipai hla tha tak tak 150 chuan theihna tur siam tum mek a ni a, hemi lo bawhzui tur hian Chief Secretary ruat a ni dawn bawk a, hemi atana hriattirna leh thuchiang zawk rawntihchhuah a ni ang.

Chan News: Ni 11th March 2011 khan Social Guidance Agency te sawmna angin Drop-in centre Melriat ah Awareness leh Anti-Human Trafficking & Legal Aspect leh Community Empowerment programme hmangin an kal.

Chief Secretary: Cheif Secretary te nupa chuan March thla hapta 3-na ah khan Hmar tlangdung ah Property Inspection neiin Corps engemawzat an tlawh a, he hunah hian Major Laithanmawia PRS te nupa in Colonel te hi an tawiam a, hun hlimawn leh hlu tak a ni.

Sipai Tlangau leh Young Salvationist Naupang Sipai hi kan rawngbawl na in hriattawna pawimawh tak a nih avangin Corps leh Society tin ten atam thei ang ber la turin kan ngen che u a, lak belh duh te chuan in bialtu Divisional Commander hnenah lak belh duh zat chiang taka ziakin thehluh tur a ni.

Sd/-
Editor

KAN LEI HRINGNUN HI LALPA PATHIAN THU THU A NI



Major P.C Lalthansanga
Aizawl Bazar Corps

Bible changthlan:

I Peter 1:24

Mi zawnng zawnng hi, Hlobet ang anni a,

An ropuina zawnng zawnng pawh hi

Hlobet par ang anni a, Lalpa thu erawh chu

Chatuanin a awm reng ang.

LEI HRINGNUN HI: Kan damchhung hi, han ngaihtuah chian chuan, chatuan atan chuan inngahna tlak a ni hauh lova, a lo derthawng em em mai a ni. Hetiang hian ka tehkhin thin a, thuhmahruai atan han sawi hmasa ila.

Lal ropui tak hian Pangpar huan mawi tak a nei a, huan enkawtu mi pakhat an ruai a, Pangpar chi hran hran a ching a. An parmawr em em a, a par buk te, a par lian deuh leh a par te deuh te, a vul chuk mai a, rawng chi hrang hrang a ni a, a mawi em em a.

NIKHAT CHU LAL HUAN NEITU FANU NULATE CHU: Huanah chuan an kal a, nuam an tiin pangparte chu mawi an ti em em mai a. Pangpar chudim miah lovin, an thliak a, an duh duh an la a, huan enkawltu chuan ngawi rengin a thlir vawng vawng a. A hau ngam silova, duh ang anga an lak hnuin an haw ta a. Huan enkawltu chuan, an thu a nih zia a hria a, a pute an ni si a. Lal fanute sulhnu chu khawhar takin, pangpar an laka an thliahna theih ang anga a han enkawl pawhin a hma ami mawina angin engmah a mawi zo ta lova. A mitthla ah a cham a, a vullai a mawi tak tak, a thla a lakte a thlir vawng vawng a. Huan neitute thu a ni miau si a, an duh duh a mawi leh tha tha, an duh hun hun a la lawr thei a ni miauva.

KAN HRINFNUN KHAWVEL AH HIAN: Mihringte hi, mize in ang lo, chi hrang hrang awmkhawm a chengho kan ni a. Mi hausate leh mirethei leh hmelchhe deuh deuh te, tin, mifing deuh te, mi a ten chengza in. Tin, thau deuh te, cher deuh te, tawi deuh te, sang deuh te, bial chim chem te, chutiang a awmkhawm pangpar huan a enkawltuin chi hrang hrang a enkawl ang khan, kan hringnun ah in chhe deuh leh in ropui taka cheng kan ni a. Chhun leh zan hun, ni leh thla, kum hmangza ka ni mek a.

AMAHERAWHCHU NITIN THLATIN KUMTIN HIAN: Huan enkawltuin duat taka pangpar a enkawl lai a, Lal fanuten an thliak a, a parte deuh, a

kuhmum thlenga an la a, a an thliak ang mai khan, Thihna nunrawng chuan kan leihringnun a kan thlakhlelh ngawih ngawih lai a rawn la in, chhungtin ah thihna chuan tahna, lunglen, khawharna a rawn thlen ta a. Thihna hian tumah a zah lova, in leh lova ropui a mite, mihausa leh rethei a thliar lova, damlo leh laina unau awm duah duah a zah chuang lova, lehkhathiam leh lal ropui pawh hi a zah chuang lova. Chuvang chuan hringnun hun khawvel kan awm chhungah hian a nawmna lai hi sawitur, chhuan tur, inhumna, phen tur a vang mang e.

Tichuan, Lal inropui leh intha ah pawh, mithiam, sum leh pai ngah leh laina, unau pianpui ngah, salruah ah pawh, thihna lekah chuan han phen tur a vangin, inhumna a awmlo a ni e.

ENGTIKAH EMAW CHUAN THIHNA CHUAN: Eng hunah emaw chuan inrin aia hmian a lo thleng dawn a, Lota nupui leh chhungkua kha warning pek a nih pawhin Vantirhkoh ten an kaichhuah lai pawhin, Lota nupuiin aw aw Sadom khua tak riai ruai chu a ti a, han tih awm tak chu a ni a. Mei leh katin a kangral tur an ui a ni a. Sadom kha chu a kangral a, tuna kan sawilai mek ram hi thihna ram hi thihna in thla a zar hnuin, in leh lo roui chu a la awm a, mahse thihna meuh lo thleng atan phen tur a lo awm si lova, mi hausa, in leh lo nei tha a mi pawh a tuam zel bawk si a.

GAUTAMA Buddha chu a mangang a, in leh lo a kal san a.

GAUTAMA BUDDHA SAKHUA: Sakhua hmuchhuaktu an tih chuan, thihna leh natna pumpelth theihna a awm ringin, a nupui leh a fasen, kumkhat mi chu kalsana kum 6 aia tam kal bovin, Lal inropui leh nawmna, hausakna, sum leh pai neih tam avang ngawt chuan thlamuanna a awm loh avangin. Chutia a kal velna ah chuan Leihring nun hian thlamuanna a mamawh tih a hmuchhuak a, heti hian a thil hmuchhuah dan a sawi a.

Mi tam tak chuan, an tun hun chauh an thlir a,

duhamna leh nawmsakna chauh a zawng a. Tin, mahni hmasialna avangin an rilru leh ngaihtuahna chuan phurrit a siam a, an thlamuang lova, tichuan mahni ham thatna a nih phawt chuan duham takin tihzel an duh thin a. Chutianga an duh ang thil a lo thlen lai chuan "THIHNA" chuan an hringnun chu a rawn nang ta a. Thlamuanna neiin an awm lova, thlaphang em em in, thlanah te dahin, tin, an ruangte a then chu halral an ni a. Chutiang mite Gautama hian a hmuhin Bible changthlang hi Lalpa thu Chatuana awm tur a ni e tiin a nupui leh therual hnenah a sawi ta a ni.

CHANCHINTHA CHUAN: Lalpa thu, Chatuan atan awm reng thlir chungin, leihringnun hi engmahlomai a nih zia, Rante, Hlobet ang lek kan nih

zia, kan chuanga thuneitu chuan a duh hun hunah min ti boral thei si a. Pangpar huan enkawltu khan parmawi tak, duat takin enkawl mahse lalfanu ten an duh duh an thliak a, an la ang khan thihna chuan chhungkua a rawn fang mek si a.

Chuvangin Pathian hnenah kan nun hi thuhrukin a awm a ni tih ka hriat hma chuan, i thlamunag mai lovang u. Chutichuan, Pathian thu nung renga kan in nghah pawht chuan, AW thihna i tur chu i ti ve thei tawh ang a, kan leihringnun a ral hma hian i fimkhur ang u. Chunglama thuneitu hian thu a nei tih hria in lei lama thilah innghat lovin, chunglamah innghatin englai pawhin Lalpa chu i hnaih ang u.

MIZORAM THIMNA BER LEH A CHHUAHNA KAWNG

*Major Enggina
Chanmari West Corps*

Mizoram mihringte thimna lai ber chu, Pathian tihna leh hlauhna, Pathian mitmei venna hi ka nei tlem lutuka; rukruk leh hlepruk te, sual thil engkim kan ti ngama, Davida chuan, "Pathian chuan ka thut leh ka din pawh min hre vek a ni" a tih angin, Pathian chuan min hmu in min hre vek a ni, Pathian mitmei lam reng reng venna nei lo hian kan khawsa a, tin, chutimai pawhni lovin, Lal Isuan "Puanglo tura zep engmah a awm silova, lang lo tura thuhruk engmah a awm hek lo, tupawh beng nei chuan hre mawlh rawhse," tih thu a sawi, Marka 4:22,23 thu te pawh kha, mihring thil tih sual te hi lan hun leh puan hun hi a awm ngei ngei dawn a ni tih te hi Lal Isuan a sawi chiang em em a ni, Pathian mitmei lam reng reng venna nei lo hian, Supply Buhfai phurtu ten an tichingpena, Gas phurte, K.Oil phurte, Petrol phur ten an tichingpen a, chutiang chu chanchinbu ah chuan a inziak tam hle tawh mai a; a dik ang tih pawh a rinawma, chutiang tak chu kan ram nundan leh khawsak duhdan chu a lo ni a. Kan nundan hian Pathian hlauhna kan nei tlem em em mai a, chu chu kan ram kristian ram inti site kan thimna lai a ni a, chumi kan ram thimna lai atanga chhuhahna tur chuan, thil pawimawh chu hei hi a ni.

Kan Pathian Thu Heb. 9:27 ah chuan, "Mihring tan vawikhat thih ruat a ni a, chumi hnuah chuan rorelna a awm ang", tiin min hrilh a; He thih hnua a rorelna ah

chuan mihringte an damlaia an nungchang an sualna leh an thatna chungchang rel tur a ni a. Chumi ah chuan, an damlaia an sualna mawh chu an thlarau chuan Pathian hremna rapthlak tak mai chu a tuar phah dawn a ni tih chu. Kan Pathian thu Bible Rom 2:6-9 thuah chuan hetiang hian a inziak a, "Pathian chuan mitin an thiltih ang zelin a relsak ang, thil tha ti fan fan a, ropuina leh chawimawina leh boral theih lohna zawngtu te hnenah chuan chatuan nunna a pe ang. Amaherawh chu, kawhmawh bawla, thutak zawm lova, fel lohna zawm zawktu te chungah chuan thinurna lek thinrimna te, hreawmna leh lungngaihna nasa tak te a awm ang; Mihring thil tisual apiangte thlarau chungah a awm ang," a ti chiah mai a ni. Chumi rorelna ah chuan mihringte an damlai a Pathian zah lo leh hlau lova, tualthat te, rukruk te, miduham- milem bia te, dawthei te tenawm te, thlarau chuan an damlaia an sualna avanga a tuar phah dawn a ni tih, Pathian thu in min hrilh hi kan hriata, kan zawm hi sual thimna thiam loh channa laka chhuhahna kawng ber chu a ni, thih hnuah sual sim leh thupha chawi theih ani tawh dawn si lova.

Tichuan, kan Pathian thu, Hebrai 9:27 thu chuan, han sawi nawn leh ila, "Mihring tan vawikhat thih ruat a ni a, chumi hnuah rorelna a awm ang," a tih chiah mai chu, tuman an pumpelh thei lovang, an nungchang sualna

mawh chu an thlarau chuan Pathian hremna rapthlak tak mai chu a tuar phah dawn ani. Chu chu tuman an pumpelth thei lovang, an damlaia Pathian zah lo leh, a mitmei pawh veng love, mihring hmuh tur chauh veng a, sual thil ti thin te chu, vawikhat chu an la thi ngei ngei dawn a, chumi hnua rorelna awm tur Pathian thuin a sawi hi, tuman an pumpelth dawn lo a ni. AW, dawn ve teh lungrun.

A tawp berah chuan, mihring tan vawikhat thih ruat a ni a, chumi hnua rorelna a awm ang, tih hi Pathian

thuthlung a ni a, chu rorelna a thiam loh changa awmte chu thlarau thihna **Thihhnihna** a ni ta a, a rapthlak em em a ni, chuvangin, I thlarau hma khaw ngaiin, thlarau thihhnihna laka I him phah theihna turin, I taksa kha vawng thianghlim ang che. Taksa thih hnua rorelna awm turah thiam loh changa thlarau thihna, thihhnihna laka an him theihna turin he thu chhiartu zawng zawng leh hre phak zawng zawng te, NUN ram siamthara awm nan, Lalpan mal min sawm sak theuh rawh se.

INPEIH A HUN E

PC Lianhmingthanga

Mitin mai mahni kawng leh hna theuhvah kan buai Mem em vek a. Khawvelah hian hlimna leh nawmsakna zawngin kan tlan huai huai a. Hausaknate, ngelnghehna te zawngin tul em em in kan thawk a. Rethiin hmasawm tumin, hausain duh tawk lovin duh belh zelin kan tul em em vek mai. Pathian Aw hre tura a thu pawh chhiar hman lo leh, ngaihtuah hman lovin kan phe a. Tawngtai hun pawh nei lovin, kan tawngtai pawhin hmanhmawh takin, kam chhe tleuhna ang lekin Pathian kan be thin a ni awm e. Chutih lain natna tha lo leh accident hmangin kan thi reng a. Mitthi ina kan len chuan kan chungah pawh a thleng ve thei tih chu kan ngaihtuah ve deuh va. Vana chhawm tur awm si lovah hian kan chakna zawng zawng, kan finna zawng zawng kan hmanga, Lalpa'n chan a nei tlem hle thin awm e. Heng hi a tha viau ang chuan lang mahse, Setana dawiatna chi khat a ni e. A tawh thiam i zir ang u. Huasakna leh nawmsakna leh changkan viauna hian Pathian min hnahtir ngailo. Thi mai thei kan ni tih hriain inpeih sa reng ang u.

CHHINCHHIAHNA A THLENG KIM:

Bible a hun hnukung chhinchhiahna chi hrang hrang a thleng kim ta: Khawngaihna a chhandam, Ringtu mithianghlim te kal hun a hnai ta. Lal Isua lokal lehna 'LALPA NI' a hnai ta. Indo thu a thang reng a, Hnam hrang hrang leh ram hrang hrang an indo reng a, tam a tla reng baw a, hrite a leng a, lirate a nghing reng baw (Mk 24:6-8; Lk 21:8-11). Zawlneider tam tak an lo chhuak tawh, hmangaihna a dai ta baw (Mt 24:11,12). Chanchin Tha hi Hnam (Nation) ang chuan hrih kim a ni ta mek baw (Mt 24:14). Khawngaihna Hun khara a hmawr baw mai loh chu thil thleng tur a awm pawhin a

lang ta vak love. Chutih lai chuan khawvel hian Pathian kalsanin khawvel hmasawna leh nawmsakna bak a buaipui si lo a nih hi. Khawvelah hian khawl chi hrang hrang leh electronic lamah nasa takin hmasawna a thleng mek a. Zin velna leh kal velna te a pung dawn a ni, "Daniela tih angin hriatnate a va pung nasa em! (Dan 12:4). Paulan, "Zan hi a ral lek lek tawh a khua a var dawn ta e.." a tih kha a takin kan thleng mek a ni e (Rom 13:12)

SAKAWLHALO LANG TEP: Mithianghlim lawr (rapture) hi sakawlh lo lan hma a thleng tur nge sakawlh rorel laia thleng tur tih chu Pathian kutah dah ila. Dan bawhchhiatna thuruk chuan hman lai atang khan thawk rengin tunah chuan a thawk nasa zual hle mai. Pathian thu awih lohna, Pathian Thu kalsanna, mihring finna leh duhzaawng kawng zawhna hi Dan bawhchhiatna chu a ni a. Hei hi a hring a hrana, dan Bawhchhepa (Sakawlh) lo chhuahna bul tur chu a ni.

Khawthlang ram ropui takah chuan Pathian Thu zirtirna kalsanin; mihring tisa duhzawng leh rilru duhzawng chu Lalah an hmang ta, Eden bawhchhiatni a Thei eia loharh chhuak; diabola duh zawng, mihring hlui chu PathianThu aia dah lalin, "Human Right" an vuah ta. Hei hi sakawlh lo dinchhuahna tur a tana, dan bawhchhiatna rapthlak tak a ni. Khawthlang rama Kristian te tlukchhiatna ril ber chu Pathian Thu "Darmum khai" (Plumb line) a hmang lova, an tisa duhzawng leh rilru duhzawng an dah lal hi a ni. Setana duhzawng an zui a, Setanan an tisa leh rilru duhzawng hmangin a sawp chhe mek a ni. Khawvel finna leh hriatna lamah an sanga, an hausa a an nuamsa a, Pathian an mamawh ta lova an tisa

duhzawng an pathian ta a ni ber mai.

Khawvel ram changkang leh hausa ramah chuan mipa leh mipa inneihte, hmeichhia leh hmeichhia in neihte, patilna te, ppherh nihna te, mawngkawhurna te chu “Human Right” a ni ta vek mai. A va rapthlak em! Hun tawp a hnai a, sakawlh a hring a hranin a lo lang tep a ni.

Ram changkang inti ramah chuan, ‘Child Right’ an ti a, naupang an duhzawng leh chakzawng zalenna pek hi tih danah an neih a. An fate pawh zilhau an ngam tawh lo, an thatna tura vuak te chu thubuai neihna ni mai. Pathian Thu “Damumkhai” (plumb line) ah an hmang tlat lo a lawm. Eden bawhchhiatni atangin, diabola zia chuan mihring a fan chhuak a. Diabola zia (sual) chu kan inthlah chhawng zel a. Khawlohna a din suala pai vek kan ni (Sam 51:5). Child Right an tih chuan, diabola zia ‘sual’ mihring lo awm chu, naupan lai atangin a humhalh ta a, bawhchhiatna leh tluksanna rapthlak tak a ni. Heng zawng zawng hi hun tawp

hri vek a ni e.

RINGTU TE INPEIH ANG U: Paulan a sawi kha a lo thleng a ni “Hei hi hre rawh, ni hnuhnungah te chuan hun khirhh tak te a lo awm ang. Mi, mahni inhmangaihtu te, tangka ngainatu te, inti vei te, chapo te, Pathian sawichhetu te, nu leh pa thuawih lo te, lawmnachang hre lo te, huai kawmbawl te, hektu te, insum thei lo te, mi kawlhsem te, tha duh hauh lo te, vervek te, thu hnu dawn lo te, inngahlu te, Pathian hmangaih aia mahni lawmna mai hmangaih zawktu te an ni dawn si; Pathian ngaihsak anna an nei ang a, nimahsela thiltih theihna chu an awih lovang” tia a lo sawi kha a thleng tawh a ni (II Tim 3:1-5). Khawvel thil, nawmsakna leh zu ruih leh Damchhung khawsak ngaihtuahna hian kan lo buai lutuk palh hlauh ang e. Thang awk angin chu hun chuan min nang mai dawn a ni. Inpeih ang u, rinnaah kan awm em infi

SUAL KEIMAHA AWM TIH CHU A NI ZAWK

KT Chianga R.S

Thuampui Corps

Bible chhiar tur:- Rom.7:14-25

Rom bung 7:14-25 thu hi hriat sual palh awm thei a ni a, a hre sualtute chuan inthlahdah nan leh nun khawloh nan an hmang fo mai.

Kum 1961 leh 1975 lai velah khan, Saitual leh a chhehvel ah harhna a lo thlenga, chu harhna chuan, “*Hnehna nun ka nei,*” tih leh, “*Thianghlim famkim ka ni tawh,*” tih thu hi a rawn keng a, chu thu chuan a rawn hrin chhuah chu, “kan pianthar tawh hnu chuan, zu te inin, nula ngaiin tlangval pawh ngai mah ila, ka chhandamna a bo chuang lo, chu chu keima tih a ni lo va, sual keimaha awm tih a ni zawk,” tiin, Paula thusawi hi an rawn lakawi a, awih awm takin an chulmam thin.

He thu hi mi tam tak chuan kan la hre fuh lo fo mai. Bible thu hian tum nei leh awmze hrang neiin a sawi fo thin. Entirnan: Malsawmna chung changah pawh, Adama malsawmna a awma, hmaia thlantui luang zawih zawiha thawh a ngai a, thawh loh chuan neih lohna a ni.

Setana malsawmna a awm bawk a, diklo leh fello taka tihhausakin an awm a, mahse an chhungril nun a hlim tak tak chuang lo va, Pathianah chuan an nun chu a him lo, I Korth. 6:9-10 chhiar rawh.

Pathian malsawmna a awm leh a, sum lu atan pawisa a ngai hmasa lo va, a ram leh a felna beih hmasaka, a dang zawng chu pek belh a ni. Sum tlakchham avanga mangan chiamna a awm ve lo. Chutiang bawkin dan chungchang pawh a rawn thliar hrang veka, tisa dan, serh leh sang dan, thlarau dan leh Pathian dan thianghlim tiin, chungte chu min hmuhfiah tir turin dan leh khawngaihna a ding chhuak ta a ni.

Tisa dan chu, bawhchhiatna avanga a chhia leh tha hriatna kan neih, mihring thinlung leh rilru chezia sawi nan a hmang thin a, hei tak hi Rom bung 7:14-25 thuin a sawi chu a ni. Nihna hrang, nun hran nei angin a rawn sawi a, a hming leh nihna aiah, “Chu” tih a hmang a ni. *Sual keimaha awm tih chu a ni zawk* tiin, chu pa tih chu a lawm, chu mi tih chu a lawm tih ang hi a nih chu.

Awle, kan pianthar hnu hian, keimahniah tla kim lo a awm a, mihring ka nih chhunga min riahchilh tu tur a ni. Chungte chu:- chaknate, awhnate, itnate, thurnate, thiknate, etc chung hmang chuan kan taksa hi neih tumin setana hian min bei thin.

Mosia ruang chu Diabola leh Vantirhkohin an

inchuh ang khan, kan nitin nunah hian min chuhtu nun insual a awma, kan taksa hi hman an duh ve ve bawk a. Chu ngaihtuahna soal lo chhuahna chu Paula hian a hmu Chiang hle a ni. Pathian atanga chhuak a ni lo tih a hria a, Pathian hnawl tawh nun, tisa che vel atanga lo chhuak a nih avangin, “Tisa mi” tiin a sawia, a taksain a khawiha a tih nilo, ngaihtuahna leh suangtuahna soal lo awm thin chu, “*Keima tih a ni lo, soal keimaha awm tih chu a ni zawk,*” a ti a ni.

Jakobate unau a nu pum chhunga an insual ang leh, Rebekin phir a pai ang khan, he kan taksa khumah hian mi pahnih mudun an awm a, pakhat chu tisa mi a ni a, pakhat zawk chu Thlarau Thianghlim. He mite pahnih hian kan taksaah thuneihna chan tumin tan an la ve ve a, duhthlanna hi a pawimawh a ni tih an hriat avangin, duhthlanna hlatah an awm ngai lo.

Kan duhthlanna chuan soal a thlana a tihzui bawk si chuan, kan taksa ngei hi setana thu hnuaiawh awmin, Pathian hmelma, Pathian dotu a nih daih theih, chutak chu taksa thiltihte thlarauva tih hlum a ngaihna chu a ni. Amaherawh chu, kan duhthlanna chuan Pathian duh zawng lam a ngaihtuah chuan a hmangaih taksa a nih daih theih bawk.

Heng nun pahnih inthural thei lo te hi Paula hian a hmuh chian em avangin leh, a hriat chian em avangin

dan hawi zawngin a han pho chhuak leh ta a, Pathian chu ka rilru min ti lawm tak tak tu a ni laiin, kan taksaah duh dan hran neia, thlarau dana awm nuam tilotu hi a awm ve tlat mai a, thil thalo lam ngaihtuah ka tum tawh loh pawhin, a hun a lo thlenga, mi ngaihtuah tir leh thin.

A va han retheih thlak theih teh reng em, he thil hi tih hlum ka tum pawhin ka ti hlum thei si lo, ka ngaihtuahna sualte chu a taka ka tih puitlin lohna tura, min chhanhim tura Isua Krista min petu Pathian hnenah lawmthu ka sawi a ni, tiin Paula hian a chham chhuak ta a ni.

Vana thil awm lo leh vanmiten an tih ngai loh ti tura, Setan’ n ka taksa pengte hmanga min tihtir a tum, heng ruihtheih thil chi hrang hrang, zu, meizial, sahdah, tuibur, kuhva leh a dangte hmang hian Setana’ n ka taksa ah thuneihna chan tumin min bei a. Keimaha chakna awmten ka taksa an hman theih lohna turin a tuar lam pawh ka chhel a ngai anih hi, Setana hi hmun kian lo ila a che thei lo ber ang, “Kristaah ka awm,” ti reng chung si a thil tha lo ka tih si chuan, thiam loh min chantirtu mai a nih dawn avangin, Krista Isuaa Nunna Thlarau dan chuan Sualna leh Thihna dan ata min tichhuak tawh a nih si chuan, min chhan chhuaktu duh dan anga ka nun a ngai tawh a ni, tiin Rom bung riatah a zuang ta a ni.

“Lalpa chu chawimawi in awm fo rawh se”

HRIATTIRNA

India Eastern Territory- a Chhandamna Sipai Pawl naupangte (Junior Soldiers) pualin Inkhawnaa an hman tur Hlabu buatsaih tum a ni a, chumi atan chuan kan hlabu a naupang hla awmsa te bakah hla thar thunbelh tum a ni a, hemi atan hian-

1. Hla Inphuahsiak: Naupang hla tur bik Army Doctrine leh O&R in a pawm theih tur hla inphuahsiak tur a ni. Hla chu Tonic Solfa-a dah nghal thlap tur a ni a, thunawn nei a nih chuan chang thum aia sei lo nise. Hla phuah thar chu dt.15th June, 2011 hma in THQ ah thehluh tur a ni.

2. Endik Hun: Hla thar phuah THQ-a lo lutte chu dt.24th June, 2011 dar 11:00a.m ah endikna neih a ni ang a, result chu 2nd July 2011 dar 3:00p.m ah puan a ni ang.

3. Lawmman: Hla phuahthe chu a phuah tha ber pathumte hnenah hetiang lawmman pek an ni ang.

- a) Pakhatna - ` 1,500.00
- b) Pahinhna - ` 1,200.00
- c) Pathumna - ` 1,000.00

4. Naupang Hlabu buatsaihna turah hian a tui mi te tan August 2011 thleng THQ ah rawtna pek theih a ni. Lehkha thehluh reng reng chu Territorial Commander address-a rawn thehluh vek tur a ni.

Sd/-
Chief Secretary

MAICHAMA MEI MIN KANG THIANGHLIMTU

*Cherhlunchunga
C.T. Kawrthah Corps*

MAICHAMA MEI CHU A MIT TUR A NILO: LEV:6:13

“Keini zawngin Maicham kan nei a” Heb. 13:10, Kum kaltaa kan thupui “Keini zawngin Maicham kan nei a” tih hi Hebrai tawng chuan “Misbeah” - Ran talhna tihna a ni a. Thuthlung Hlui hunah khan maichamah hian Ran Thiang Thisen hmangin an inthawi thin a. Keini hunah chuan Lal Isuan kan tan Maicham chu Kraws-ah rawn buatsaihin, Ama Thisen ngei mai chuan Pa thinlung lama kan sualna zawng zawng leh kan lo thianghlim tawh lohna zawng zawng chu min silfai sakin, mifel leh thianghlimah min lo puang leh ta a ni.

II Korinth 6:17 thu a kan hmuh angin, “An mahniah ka awm anga, an mahniah ka leng bawk ang a, an Pathian ka ni ang a, an ni pawh ka mi te an ni ang,” a tih ang khan. Thlarau Thianghlim ngei mai chu keimahniah lo thleng in chu chuan kan bawhchhiatna te leh kan sualna te kan thianghlim lohna te chu min hmuhfiah tir a, keimahni ngei mai chuan kan thianghlimna turin amah chu kan pan thei ta thin a ni.

Maichama mei chu a mit tur a ni lo, tih kan Pathian thu a kan hmuh angin, Pathian Thlarau Thianghlim keimahni a awm chu, kan ti mit tur a ni lova, chu chu kan nitin nuna min tithianghlim zel tur a ni si a.

Thuthlung Hlui hunah pawh, maichamah inthawina buatsaihin chutah chuan an ran inthawina tur ruang chu dahin meiin an halral thin a, mei hi nung reng lovin ran thisen ruang hi kangral ta lo sela chuan a tawih anga a rim chhia in mi tan hnawksak a tling mai dawn a ni. Chutiang chiah chuan keimahni a thlarau thianghlim awm hi ka hnawl a, kan duh lohva, a thu ang a kan nun kan kalpui duh loh chuan sualna in kan chungah ro a rel ang a, kan chan tur chu thihna a ni mai dawn a ni.

Kan tuh hunah pawh hian mi tam tak chuan keimahni a Thlarau Thianghlim awm hi sum leh pai duhamnate, nawmsaknateleh chapo, elrel, itsiknate hmangin kan ti mit leh fo thin a ni. Chumi a nih avang chuan keimahni ah Pathian thianghlimna chu rah chhuak thei lovin rah thalo pui pui chu a lang chhuak zawk thin a ni.

Chuvangin, Pathian zepui ber thianghlimna chang tawh tute, keini Salvation Army-te hian amah a thianghlim anga kan thianghlim zel theih nan Thlarau Thianghlim hi i ti mit lovang u. Penticost ni a, Thlarau Thianghin a lo thlen ni khan mi a mahah sualnate leh khawlohnate a hriat a, chutiang chiah chuan keini ngei mai pawh hi Thlarau Thianghlim chuan kan ni tin nun a sual lo lang hi min hmuhfiah tir a, Tirhkoh Paul-an “Nitin ka thi thin” a lo tih angin, sual thihsan nun chu a neihtir theih thin a ni.

Pathian Thlarau Thianghlim keimahni a awm chu kan vawn nun reng theih nan chuan, a thupek kan zawm a ngai a ni. Mari ngei pawh kha Pathian Fapa Isua amah atanga a lo pian chhuah theihna chhan chu “I thu ang zelin ka chungah thleng rawh se” a tih ngam na chiahah Pathian ropuina amahah a lo lang chhuak thei chuah a ni.

Pathian Thlarau Thianghlim thiil tih theihna leh ropuina keimahniah a lan chhuah theihna tur chuan, Bel vawtuin a bel vuakna tur hlum a duh ang anga a hmetsawikual vel ang hian, Lalpa i duh ang angin min hmang rawh, dawl zawrin ka zawr e, titute hnenah Pathian Thlarau Thianghlim chu a zalen a, an mahni ah ropuina leh thiltih theihna chu a lo lang thei ta thin a ni.

Galatia 5:16 thu a kan hmuh angin a, “Thlarauah awm rawh u, tichuan tisa chakna chu in zawm dawn a nia,” a ti a. Tisa chakna sual bawhlhlawha kan tlukluh loh nan thlarauva awm turin min duha, chu chu Pathian thupek zawma awm hi a ni a, chu thlarau hruaina hnuaiawm awm apiangte chuan tisa chakna sual an mahnia lo lang thin chu an hneh zelin an mahni chu an nitin nunah an inti thianghlim thei thin a ni. “Maicham a mei chu a mit tur a nilo,” tihziak kan hmuh ang hian, keimahnia Pathian Thlarau Thianghlim awm hi i ti mit lovang u, chu chu kan nitin nuna sual min kang kaitu a ni si a. Thianghlimna lovin tuman Pa hmel an hmu lovang a tih angin Pa hmel kan hmuh theih nan leh kan lo thianghlim zel theih nan Pathian Thlarau thianghlim chu i ti mit lovang u, maichama mei chu a mit tur a ni lo, chhiartu zawng zawngte Lalpan malsawm che u rawh se. Amen

MEI KA ZU VE TAN



*Lalrindiki
Temple Corps*

Hmanlai chuan nu leh pa ten an fate chu meizuk an zirtir thin a. A chhan chu kuthnathawk a eizawng an ni a, lova hlo thlawhnaah mei an zuk chuan Thosi seh lakah an him thin a ni. Chuvangin naupan lai atangin mei an zu a, hmeichhiate chuan Meilai an zu thin a. Nu fel chuan an thiante mei a thih vek lai pawha thiante fawhkai tur mei an zu nung reng thin.

Tunlai hunah erawh chuan Meizuk that loh zia kan in zirtir nasa ta hle mai. Meizuk hi taksa tan a thatlohna tam tak a awm mai bakah tul hauh lova sum leh pai khawhralna a nih zia te, a zutu tan a thatloh mai bakah, a bula a khu lo hip ve tu (secondhand smoke) tana a pawia zia te pawh kan hre theih in a rinawm. Mizoram sorkar pawhin awmkhawmna hmunah te, Office ah te meizuk a khap a. Sorkar office ah pawh meizuk loh tur tih leh meizu chu man theih an nih thu te a intar kelh kulh a. Meizu chu an man a, pawisa an chawitir ta hial mai. Sipai Pawl chhungkaw zingah phei chuan meizuk thatloh zia kan inzirtir mai bakah ruihtheih thil dang reng reng tilo turin kan intiam vek a ni.

Keipawh Sipai Pawla pianga seilian, Sipai Pawl hnutetuaia chawmlen, ruihtheih thil reng reng tilo tura intiam leh midangte pawh pawh chutiang ti ve tura zirtir tur intiam ka ni a, vawiin thleng hian Home League member ka la ni fan a. Tin, hnathawhna lamah pawh nitin office ah ka kal ve thin a, kan office ah chuan 'Mei zu suh'tih te 'Helaia meizuk hi phalloh a ni' tih te kan tar kuau mai a. Chutiang ni chungka ka thupui thlan chu 'Mei ka zu ve tan' tih a ni tlat baw si a. A in kawkalh hle mai. Mahse meizu chu ka ni ve tlat si a. Ka naupang laia ka thian pakhat chuan, "Meizial zuk hi a tui ka ti hranpa lova, mahse meizuk ruk hi nuam ka ti ve hrim hrim" a ti a. Kei chu mei ka zuru lem lova, mahse mei ka zu ve tan a ni. Ka meizuk thu hi ka pasal leh ka fate pawh ka la hrih lova, an la hriat hmain ka han hrih hmasa dawn che a ni.

Tum khat chu dawr pakhat a thil lei a ka din laiin mi pakhat hian Sikret a lei ve a. A sikret lei chu bawmkhat ` .35/- man a ni a. A chhuah hnu chuan dawr neitu chu ka zawt a, "Khatieng kha engtia rei nge an zuk ang" ka ti a. Dawr neitu chuan, "Nikhatah bawm hnih te bawmthum te an zu, a ai tam pawh" a ti a. Nikhata meizial mana mite insen tam dan ka ngaihtuahin mei ka zuk ngailoh avangin ka lawm hle a. Thil dang dang te ka ngaihtuah hnuin Dawr neitu chu ka zawt leh ta a. "A nih leh Sikret hi a mantlawm deuh engzatman nge? mi tam berin eng ang chi nge an zuk thin" ka ti a. Chu chhanna ka hriat chuan ka rilruin thuthlukna ka siam thei ta a. 'Naktuk atangin mei ka zu tan ang,' tiin.

Meizuk hi hriselna atan a thalo hle a, kan kawchhung lam atan a thatloh zia te sawi ka tum lem lova. Mahse meizuk hi, meizutu aiin, a bula a khu lo hipluttu (secong hand smoke) tan a thalo zawk ani an ti a. Amaherawhchu keichu ka keimah aiin ka bul vela mamawhtu tan a tha zawk ngei turin Mei ka zu ve teh ang ka ti ta a. Tichuan a tuk February nikhatna chu a lo chhuak ta a. Ka rilru chuan, 'Mi naran mai ka ni a, sikret manto tak chu ka zu pha lova, ` . 20/- man hi ka zu tan mai ang a. Tin meizu tantir ka ni a, nikhatah bawmkhat hi ka tlatawk vel ang' tiin Sikret bawmkhat man ` .20/- chu Envelope varah ka khung tan ta a. Hmanlai hmeichhiain thiante fawhkai theih tura mei an zu nung reng ang khan Lalpan rem a tih chuan nung reng tura meizuk ka tum a ni. He thu ka ziah lai hian thlakhat vel chauh a la ni a, ka meizial man pawh tam tak ka la khawllo na chungin kumkhat hnuah chuan tu emaw tan malsawmna a lo ni thei ngei ang tih ka rin avangin ka rilru lamah phurna leh chona min pe nasa hle mai. He ka meizuk khu hi ka bula midangte tan rimchhia ni lovin, mamawhtu te tan malsawmna thlen turin parchhuang se. Ka meizuk anga i zu ve duh a nih chuan i fawhkai tura zuk nun reng hi ka duhthusam leh ka tawngtaina a ni e.

CHANCHIN LAWRKHAWMTE

SAWLENG CAMPING HLAWHTLING : Ni 10 - 26 February 2011 chung khan Sawleng Corps chuan Evan Challianthanga leh Team te ruaiin Chhandamna Camping chhawngli lai hlawhtling takin an nei a. Thlarau thianghlimin nasa takin hna a thawk a, Chhandamna chang thar leh Thlarau Thianghlim khawih nawn leh siam tharlehna chang mi tam tak an awm a. Kohhran hrang hrang atang pawhin he Camping ah hian an lut hlawm a, hetiangin:

Salvation Army atangin - - 185.
 Presbyterian atangin - - 100.
 Lalchungkua atangin - - 5.
 E.F.C.I atangin - - 4.
 Rinna Kohhran atangin - - 1.
 Kohhran hrang hrang atangin naupang
 145 an lut bawk.

Evangilist Challianthanga leh a Team te kal tlanga Pathian in puanna avangin Sawleng khawtlang ah Thlarau Thianghlim hnathawh a thleng a, an hlim hle a. Lapa chu fakin awm rawhse.



CENTRAL NORTH DIVISION AIZAWL AREA H.L SEMINAR : Ni 5 -6 February khan Central North Division Aizawl Area Women Ministry Seminar Zemabawk Corps ah neih a ni a, mi hrang hrangin “I din leh ang u” tih thupui hmangin Paper an present hlawm a, chung te atang chuan sawihona hun tha tak an nei a, chung an sawiho te chu :

1. Ramri piahlam thlenga rawngbawl dan tur :

- (1) Kal chhuak theilo tan, Sum thawh khawm a thawn.
- (2) Tawngtaina neih tam.

2. Buhfaitham tam zawk a kan tham theih nan :



- (1) Lal Isua thlak kep tur.
- (2) Hause to Hause Campaign neih tur.
- (3) Buhfai chauh nilo, Sum thawh pawh uar tur.
- (4) Buhfai tham Bel siam vek nise.
- (5) Buhfai tham Campaign neih tam nise.

3. Literature lam, Chunnunpar leh a dang te Home League member ten kan chhiar tam theih nan

- (1) Hei aia changtlung leh chhiar nuam tura siam nise, a man pawh tam deuh mai se.
- (2) A Cover leh milem te pawh hi tun aia fiahfai zawk i ni thei se.

4. Thuawihna kawng hetiang hian in din thar leh ila:

- (1) Hotute zahna leh ngaihsanna kawngah.
- (2) Sipai zia leh kalphung hi thlatin vawikhat tal thianghlima inkhawm ah in zirtir ni thin se.
- (3) Chhiatni ah Sipai te hian Uniform hak hi tun aiin uar thar leh ila.
- (4) Local Officer te Zuk leh hmuam ah midang te entawn



ah tang ngam turin tan la thar ila.

- (5) Bial chung Sipai damlo leh tanpui ngai te ngaihsak in C.O. leh L.O. ten tan la thar se.

5. Sipai zia kan hlamchhiah tawh heng te hi tih thar leh ni se :

- (1) Thingthi a tawngtai.
- (2) Mual inkhawm
- (3) Hla chang hmang a dil rual.
- (4) CO leh LO ten bial tlawh uar leh zual se.
- (5) Sipai hla sak uar ni bawk se.

6. Uniform ha chungin hengte hi tih loh ni se :

Puan zeh bih, Jean kekawr hak, Bengbeh beh, Thi awrh, Sahdah leh Tuibur hmuam, Meizial zuk, Kuhva ei, Puanfen tight leh chhing lutuk fen, Fiamthu thianghlimlo sawi, Zuruiah leh pawisa khelh, Make up uchuak, Mirel, Mi thil zawrh dawn vak vak, Inkhawm lai a chhuah fo.

7. Mahni Corps theuh ah hengah te hian din thar leh ni se :

Inkhawm taimak, Thilpekah, L.O. te mahni chanpual theuh ah tan lak thar, Inkhawm kal hma, Biakin manner vawn that, Thalai te chawhpur, Biakin ah Bible leh Hlabu ken uar, Key board hmang a zai hruai thin, Uniform hak taimak.

Ni hnih chung he Seminar hi neih a ni a, a kal ten kan hlawkpui hle a. A thlengtu Zemabawk Corps te an fakawm hle mai, tlai lamah ruai min siam sak ziah bawk a, tisa leh thlarau lamah kan puar hle. Khamlo takin he Seminar hi mahni Corps theuhah malsawmna thlentu ni turin kan tin ta a ni.

CENTRAL NORTH DIVISION L.O RALLY: Ni 11-13 March 2011 chung khan Central North Division Local Officer Rally Zemabawk Corps ah neih a ni



a, he rally hmang tur hian Corps leh Society 69 atangin Local Officer 455 an lo kal khawm a. He khawmpui chung hian vawi 7 inkhawm awmin, thupui hrang hrang hmangin mi 6 in thu an sawi a, final meeting ah Major Sangchhunga Divisional Commander in Local Officer te mawhpurhna leh an tih turte sawiin hun a khar a. Local Officer 157 ten thutiaM tihthar lehna neiin Pathian hnenah inhlanna an nei bawk.

Local Officer 13 Commission hlan thar an ni: He rally chung hian mi pakhat hnenah Local Officer pension na hlan a ni a, mi 13 te Local Officer atana Commission thar an ni a. Urhsun takin anmahni nemnghehna leh certificate hlanna hun hi hman a ni.

He rally chung hian Corps hrang hrang SAY



bakah Territorial Songster, Central North Division songster te, Territorial Staff Band te, zaipawl te, band display te, solo leh timbrel display, worship dance leh thil dang benglut tak tak ngaihlak a ni a. Rally neih chung inrini leh chawlhni tlaiah a thlengtu Zemabawk Corps te hian hneh takin palai zawng zawng te tan ruai an buatsaih saka palai zawng zawng te tisa leh thlarau ah an tlai hle.

N.VANLAIPHAI CORPS CRUSADE: Ni 18-20 March 2011 khan Capt.Lalringngeta bialtu C.O thahnemngaihna N. Vanlaiphai Corps ah crusade neih a ni a. Pu C Rosanga Ebenezer Corps leh a naute an kal a, Sermon chi hrang hrang ngaihlak a ni in Corps mipuite thlarau lamah a chawkung hle a, an hlimtlang in an kham lo hle mai a, inkhawm apiangin nula Esther- i Enna Corps in Pathian fakna hla hmangin rawngbawlna a nei reng bawk a, inkhawm an pung tual tual a, zing tawngtai inkhawm te pawh bul an tan leh thei ta.



Ropuinaa kaisangte

1. Maj Pangmani: Maj Pangmani hi ni 7.10.1930 ah Tualte khuaah Hrangburha leh Darchuhi te fa hmasa ber niin a lo piang a, a hming hi a pu (a pa pa) Tualte lal Dokham'n Tumpang sial a kah hming chawiin Tumpangmani ti a phuah a ni. Dokhama hi Tualte Zahau Lal Nikuala fapa a ni.



Pi Panghi hi Mahor Sapzinga nen ni 6.3.1950 ah Kulikawn Central Corps ah Col. W.E. Carter kutah an innei a (an inneih tum hian a rualin nupa tuak sarih an innei). Fapa 3 leh fanu 3 an nei a ni. Maj Panghi hian tu leh tuchhuan 22 a nei a, Tu leh fate hmangaih em em thin niin "ka tu leh fate hian ka thin an tirim the tak tak lo a ni" a ti thin a, an duhzawng tihhlawhtlinsak hi a tum ber a ni thin.

Major Panghi hi unau rual tak zinga upa ber a nih avangin Champhaiah pawlruk thleng chauh a zir zawhin inlam leh Inchhungkhur hna te thawkin a tangkai a ni. Kum 1949 ah SALvation Army Officer ni turin a training a, a training session hming chu 'Puanzar putute' tih a ni. An nupa hian Corps pali - Arro Corps, Sialhawk Corps, Pawlrang Corps leh Tualte Corps ah te C.O in an awm tawh a, kum 1969 ah a pasal Major Sapzinga hrisel lohna avangin voluntary pension an an chawl ta a ni. Hemi hnu pawh hian a phak ang tawka Pathian rawngbawl hna chhun zawm zelin tawngtai leh thilpek lamah te thahnem a ngai ve hle a, Pathian biak Inkhawm thulh hi a thil hreawm tih ber a ni thin a, a dam phawt chuan inkhawm hram a tum tlat thin. Major Panghi hi mi khawngaih thei tak a ni a, a dawr nghah chhungin mi hnuai hnung leh harsa zawkte kut ruakin a kal tir ngai lo a ni.

A nat dan: Ni 15.11.2008 khan thiin a rawn hawrh ta vak mai a, Damdawiin panpui nghal a ni a, hetah hian a chhan hrtiat tumin khawl hrang hrang a en nghal a ni a, Phing Cancer a ni tih hriatchhuah a ni ta a ni. Damdawi inah hun rei vaklo a awm hnuin in lamah

enkawl chhoh a ni a, hun engemawchen chu harsatna neilo in Pathian biakin a inkhawm pawh a bahlah chunglo a, a hun a lo kal zel a, ni 4.7.2010 atang khan Biak-in ah a inkhawm peihlo tan a, inkhawm a peihloh hnu pawh hian inkhawm hunah chuan inkhawm turin a insiam thin a, amaerawhchu a taksa in a tlin tawh lo thin a ni. Ni 29.8.2010 atangin a natna hi na a tih em avanfin a bawksawp tan a, Doctorte rawnin damdawi hmanga enkawl chhoh a ni a, hemi hnu atang hian a natna hi tawrh hreawm erawh chuan a tho kang ta lo a ni. Hemi hnu hian khumah chaw te pek thin niin enkawl chhoh zel a ni a, natna hi a zual chhoh zel avangin ni 3.3.2011 atang khan chaw a ei peih ta lova heta tang hi chuan hniam lam pan chho hret hreti hun reitak in lamah inenkawl a nih hnuah ni 24.3.2011 zing dar 8:20 khan a rawng a bawl thin a Lalpa hnenah min lo kalsan ta a ni. Amah thlahna inkhawm ah hian Lt.Col Lalramhluna C.S in thlamuanna thuchah a sawi a, Maj. Thanhlira P.S in inkhawm a kaihruai a, thlanmualah C.O in hun hnuhung a hmang baw a, a rawngbawlpui leh thenrual tha ten ui tak chungin kan thlah liam ta a ni.

1. Pu.Buanlawma CSM (R) Hebron Corps Kawnpui :Kum 1932 ah North Chaltlang ah Pu.Zuluaia leh Hmartawnvungi te fa tlum ber niin a lo piang a. An unau hi pahnih chauh an ni a. Kum 1937 ah Salvation Army ah an awm tawh a ni. Anaupan lai atang rengin mi chimlim tak, thil dik duh mi a ni a. Zitirtu hna thawkin hmun hrang hrang ah te a awm thin a, Kum 1995 ah Kawnpui Primary Sikul -111 ah Head Teacher niin a pensioned thlengin a thawk a ni. Pathian leh Sipai pawl tan mi thahnemngai tak a ni a, a hun tawp thlengin a phak tawkah chuan thahnem a ngai em em a ni.

Rawngbawlna lamah chuan awm hmun a sawn zin avangin nihna a chelh vak lova, Kawnpui khua a awm hnuin kum 1976- 1989 chhungin Corps Treasurer hna a thawk a, Kum 1989 - 1994 chhungin Hebron Corps Kawnpui ah CSM a ni a. Kum 1994 khan CSM atangin a lo Retired ta a ni. Pathian rawngbawl hi nuam a tih zawng tak a ni a, a hun tam ber chu Biakin ah a hmang thin a, amah chauh pawhin a hnatlang mai zel a ni. Biakin leh a vel tihfai te hi a nuam tih zawng a ni a, thil chhinchhiah

peih tak mai a ni baw, Corps History pawh hi amah atanga an siam deuh vek a ni. Thla (Moon) ah Sipai pawl Flag hi zar a ni ngei em? tih pawh IHQ London ah a zuk zawtfiah ngat a ni. A hunlaiin Foreign siam Tawtawrawt mahni tawka nei thei ngat a ni baw. He Tawtawrawt hi a hun tawp thlengin tha takin a vawng a, a tupa tan a hnutchhiah nghe nghe a ni.

Kum 1972 ah Pi, Romawii nen innein fa pahni an nei a, kohhran lam bakah khawtlang tan pawh mi tangkai tak a ni. YMA/ MUP/ MCPA/ BSI ah te hian nihna pawimawh tak tak a chelh thin baw. A Bible chang nginat ber chu “Hetah hian khawhmun nghet kan nei silova,.....Heb 13 : 14 hi a ni a. A Hla duh ber chu “Ram ropui tak lo thleng tur kan nghah...” tih hi a ni baw. Sipai pawl chhinchhiahna hi a ngaina em em a, a inchhung hmun tin ah hian a bel thluah baw thin a, mite hrilfhiah leh zirtir kawngah pawh thahnem a ngai thei hle thin a ni.

Hlim taka rawng a bawl laiin Kum 2005 atangin zun kawng lamah harsatna a nei tan a, kum 2010 August thla atang phei chuan khumbetin a na ta a, damdawiin lam te panpui ni mahse a ziaawm thei chuanloh avangin anmahni In alamah enkawl a ni ta a. December 31, 2010 khan Ropuina ramah a rawngbawlpui te leh a fate min kalsan ta a ni. A mah thlahna inkhawm hi a chenna in ah leh Biakin ah neih a ni a, Maj. Biakliana D.C in thlamuanna thuchah a sawi a, Kolasib Band te lokal in thiam takin Biakin ah leh thlanmual ah rimawiin an awi liam a. A rawngbawlpui sipai te leh thenrual tha ten ui takin kan thlah liam ta a ni.

2. Pu. Chalkhuma Kum 75 Ratu Corps :

Pu, Vanthanga YPSM leh Pi, Chawnbangi te fapa niin Kum 1936 ah Ratu ah a lo piang a, Pi, Lalthangi nen N 15.3.1955 ah an innein a, f pasarih an nei a a ni. Ama hi Pu, Chalchhuna tup chhuan khatna a ni a, a hmin pawh hi Pu, Chalchhun fanu Pi, Biaki Pu, Chalchhuna khum tura a phuah a ni. Pi, Biaki hi sipai rinawm leh thahnemngai tak mai a ni a. A beisei angin Chalkhuma hi a awm lo a ni ang, Biakin ah, “A pu, Chalchhuna khum tura ka sak a ni a, Khumlehlova tih leh tur a ni” a ti hial a ni.



Chutichuan Pu, Chalkhuma chuan a theih ang taw, tawkin rawngbawlna chu a chhuzawm leh ta a. Amah hi zaidam tak leh mi pawisawi ngailo mi tak a ni a, mi taima tak a ni baw. Hetia a theih ang taw, taw, a rawngbawlna a neih lai mek hian kum 2010 khan natna khirh takin a tlakbuak ta a. April thla ah Aizawl ah Doctor rawn in a kal a, Chuap Cancer a ni tih hmuh chhuah a ni a. Aizawl ah hun engemaw chen enkawl a nih hnuin a lo haw a, that lam pan angin lang thin mahse a sawt thei lo hle mai a. A nat chuan zual lam a pan leh ta a, rei tak anmahni in lamah enkawl a nih hnuin Ni 27 January 2011 chhun Dar 12 :30 khan Ropuina ramah min kalsan ta a ni.

Ni 28 January 2011 Capt. Vanlafakin In lamah thlamuanna thuchah a sawi a, thlanmual lamah Capt. Lalringgheta C.O. Sakawrdai bialin thahna hun hnung a hmang a, A rawngbawlpui sipai leh then rual tha ten ui tak chungin kan thlah liam ta a ni.

3. Pu. Mangzika Kum 61. Ratu Corps :

Kum 1950 ah Ratu ah a lo piang a, Ni 4. May 1981 ah Pi. Lalthangi mawii nen an innein a, fa paruk an nei a. Pu. Mangzika hi mi nunnem leh zaidam tak, taima rumrut mai a ni a, Pathian tih mi leh rawngbawlna lamah pawh mi hratkawheng a ni. Pathian ram thilpekte pawh ngai pawimawh tak mi a ni a. A dam phawt chuan inkhawm a thull ngailo. Thahnemngai taka rawngbawlna a kalpui mek laiin kum 1999 atang khan a hriselna a thalo tan a, Ashma natna a lo nei a, chaklo tak chung pawhin rawngbawlna chu a kal chhoh pui zel a. Kum 2006 atangin a natna chu a lo zual tan a, chutichung pawh in rawngbawlna chu a theih ang angin a la chhunzawm zel a ni. Kum 2009 atang phei chuan Biakin pawh a thleng thei ta meuh lo. Aizawl ah Doctor te an rawn a, Chuap Cacer a ni tih hmuh chhuah a ni leh a. Aizawl ah hun engemaw chen enkawl a nih hnuin Christmas dawn khan a rawn haw a. that lam a pan thei ta vak lova, Ni 20 February 2011 Pathianni zing Dar 5:00 khan Ropuina ramah min kalsan ta a ni. Capt. Lalringgheta Sakawrdai Bialtu C.O in thlamuanna thuchah sawiin, Sipai te leh thenrual tha ten ui tak chungin kan thlah liam ta a ni.



Reports:

COMMUNITY HEALTH AND EDUCATION PROGRAMME

Major Lalthlamuani
Guwahati



Kum 2006 atanga Guwahati Slum Area a mirethei te tana chaw a thlawna sem rawngbawl na kal chho zelah, kum 2009, July atangin heng miretheite fa, school kalna chang pawh hre lova khawlaia tal mai mai te tan Non-formal School hawn a lo ni ta. He School ah hian naupangte zirtirna hrang hrang pek an niin, chhun chaw (lunch) a thlawna pek thin an ni.

He school in a tum ber chu, heng naupangte an nunkawng dawm kan a, kawng dik zirtir mai piah lamah, he rawngbawl na hmanga Pathian hmangaihna an lo hriat a, an nu leh pa te thlenga Pathian hmangaihna hriattir a ni. William Booth a'n 'Bualfaila, Eitur pe la, Chhandamna rawh' a tih angin he rawngbawl na hi kalpui a ni.



Thawhtanni atanga Zirtawpni thleng, dar 10 am – 1 pm thleng naupang 40 te ziak leh chhiar mai bak ah Bible story leh Christian hla te zirtir thin an ni a, tin, English, Assamese leh Hindi zirna hun siam sak an ni bawk. School tan hma zing tin leh lunch pek dawn apiangin Devotion neih pui thin an ni. Tunah hian zirtirtu pahnih chhawr mek an ni. Kan zirlaite zinga tih tha te hi kan school bul vel a cheng local mi te'n an lawmman tur an tum sak thin a, tin, MSW zirlai ten project work khawih nan an rawn hmang thin bawk.

Chaw hnu lamah School pangngaia kal thin tuition la duh te tan Class I – X hmun dang aia man tlawm zawkin tuition hi pek thin an ni.

Thlatin vawihnih doctor ruaiin free medical clinic hawn thin a ni a, damlo inentira lokal te a thlawna damdawi pek thin an ni. Tin, thlathum danah vawikhat heng miretheite chenna hmunah hian Health Awareness Camp leh zirlai naupang te tan recreational activities (zoo, park, museum etc tlawhna) neih pui thin an ni. Thla khata

Pathianni vawikhat zirlai naupangte leh an nu leh pa te ko khawmin Inkhawmna hun neih pui thin an ni.

Kan hotute min beiseina angin he programme atan hian NGO hrang hrang te leh Govt. Agencies te thawhpui an ni a. Childline, STEP (Society for Social Transformation and Environment Protection), SSA, ARLDF (Asian Rural Life Development Foundation), NPCPD (National Institute of Public Cooperation & Child Development), CASA etc. te hnen atang hian advice leh tanpuina eng emaw zat dawn tawh a ni a, tin, kan zirtirtute training min pek sak thin bawk a ni.

Pathianin mite hnenah hna thawkin, he rawngbawl na atan hian mi chihrang hrang hnen atangin donation kan dawng thin a. November, 2009 – December, 2010 chungin pawisa fai (cash) ` 101,493.00 leh bungrua engemaw zat mi inphal te hnen atangin hmuhchhuah a ni a, chung min petute chu:

- 1) Ms VL Nghaki Pachuau, Aizawl
- 2) Ms Sundaythangi, Aizawl
- 3) Mr Lalramhluna (Tea), Ebenezer Corps
- 4) Pu Lalmuanzova, Ramhlun Corps
- 5) Pu Engmawia, MCS; Zemabawk Corps
- 6) Ms VL Tluangi, Lunglei
- 7) Ms Ruati, Kolasib Venglai Corps
- 8) Ms Sawmi leh a thian te, Temple Corps
- 9) Ms Ruati, Dinthar Corps
- 10) Pi R. Lalmachhuani, Bazar Corps
- 11) Pu Benjamin Vaiphei, Guwahati
- 12) Capt. Sangma, Guwahati
- 13) Mr. Remtluanga, Lunglei
- 14) Ms Rachel White Wood, London, UK
- 15) Mr Carl White Wood, London, UK
- 16) Mr Sata, Champhai Corps
- 17) Mr Thangvuta, Bethel Corps
- 18) Ebenezer YP Corps, Aizawl
- 19) Mrs. Zawna Makimi, Aizawl
- 20) Mrs. Enkawli Gogoi, Guwahati City Corps
- 21) Mr Huapa, Guwahati
- 22) David Whitener, America
- 23) Mr Chama, Lunglei
- 24) Mrs. Sawmteii, Guwahati

- 25) Mrs. Laltinkimi, Citadel Corps; Lunglei
 26) Ms Zonunsangi & friends, Ramhlun Corps
 27) Mrs. Zikpuii Rajkho, Guwahati
 28) Mr. Pinku Datta
 29) Mr. Utpalchandra, Guwahati

In kind :

- 30) Bialtu MLA, Capt. Robin Bordoloi - Damdawi sem tur
 31) Mrs. Zikpuii, Guwahati - Weight Machine
 32) Roberta leh a thiante, Temple Corps - Football & Volley ball
 33) Ms VL Nghaki Pachuau, Aizawl - Water Filter
 34) Mr. Zara, Guwahati - Secondhand cloth
 35) Mrs. Zikpuii Rajkho, Guwahati - Children's toys
 36) Dr. Bobby, Guwahati - Secondhand cloth
 37) Pi Lalawithangi, Guwahati - Wall clock
 38) Pi Lalawithangi & friends, Guwahati - Ceiling fan, 2 nos.
 39) Tv. Lalremtluanga, Lunglei - Lunglehkha
 40) Pi Makimi Zira, Guwahati - Clothes
 41) Pi Madini, Guwahati - Clothes
 42) Mr. Mike & Judy, America - Gifts

Ebenezer Corps YP te hnen atang hian January, 2010 atangin thlatin ` 1000.00 dawn thin a ni a,



kumin 2011 atang hian ` 1500.00 ah anrawn ti pung a ni. Ms VL Tluangi, Lunglei hnen atangin thlatin ` 1000.00 dawn thin a ni bawkw.

Bul kan tan tirh ata tun hun thlenga hmasawna nasa tak nei theia min hruaitu chu Pathian a ni a, he rawngbawlna avanga kan zirlai pahnih te school pangngai (formal school) a an luh theih tak hial avang te hian kan lawm em em a ni. He kan rawngbawlna tlawm tak chanchin hi Assam ram

chanchinbu lian ber 'The Assam Tribune' in an column a min chhuah sak avangin kan lawm hle a. Tin, America atanga lokal Educational Consultant te'n zirtawpni apianga kan naupangte English leh Pathian thu zirtirna an rawn neih thin avang te hian kan lawm tak zet zet a, Mizoram atanga lozin te'n kan hmun hma te min hlutsak a, kan chaw sem te min rawn puih thin avangin kan lawmin, heng achunga kan sawi tak te, tanpuina hrang hrang min pe tute chungah leh kan rawngbawlna a hmun ngei a min rawn hmuhpui tu te chung ah hian lawmthu kan sawi tak meuh meuh a ni. A let tam takin Lalpa'n a rul ngei ang tih kan ringin, chu chu kan tawngtaina pawh a ni.

CHHOTAGONGRAI LEH SIMALUNG (*Than Khua*) BIAK IN SAK WORK CAMP REPORT

*Maj. Vanlalthuma
 C.O Bazar Bial*



Aizawl Bazar C.O bial hruaitute remruatnain dt 14.2.11 khang khing Khaw pahnih (2) a biakin sa tur khian Pu H. Lalbiaka QM Chanmari West leh Pu Chawnghlira Colour Sergeant Chanmari te nen Tripura kan pan a. Behliangchhip atangin Capt. Rohlupua C.O, Pu Zokima mistiri, Pu Thara mistiri leh Pu Thangliana CSM (R) ten min rawn zawm bawkw. Chhotogongrai leh Simalung hi khaw in thenawm in auh phak ang leh hi a ni a, Aizawl atang chuan a lo hla fu mai a, ni hnih kan tlan hnuah ke in darkar khat vel kan kal leh a, Chhotogongrai chu zan dar 8:00 velah kan thleng ta a ni.

a zau chu kan sa zo ta mai a. Simalungah kal lehin, hetah hi chuan thingzai duh lei tur a awm loh avangin, thingtuai kan pu chawp a, thing kan hembhel chawp bawkw a, a hautak hle mai. Mahse, ni 18-19.2.11 (ni hnih chung bawkin) Biakin 12'x24' a zau chu kan sa zo leh ta mai a, kan va lawm em! Heng Biakin te hi a chung leh bang rangva vek a ni a, an khua atan chuan in tha leh ropui tak niin a langsar lurh mai a ni.

Chhotogongrai ah hian Thingzai leh Rangva hmangin ni 16-17.2.11 (ni hnih chungin) Biakin 15'x30' Sipai Tlangau May 2011

A mi chengte: Anmahni hi Mualthuam hnam an ni a, Hindu leh Salvation Army chauh an awm. An nun ala hniamin an khawsak a harsa em em a, changel hnahah vek chaw an ei a, chaw leh chawhmeh pawh kutin an

sem vek a, an tawngin A,AW pawh an la nei lo a ni awm e. Thil engkim zirtir ngai an ni a, EK IN pawh an la nei lo. Mahse, an rinawm viau a ni ang, ruk ruk a awm ve ngai lo a, engmah a bo ngai lo an ti. Mizo te nen kan inang hle a, tawng pawh inang a tam mai. TUMBU pawh hi an ni chuan CHANGVUI an ti.(Changvui tih hi a mawi mah lo maw.)

Min en dan: Hmanlai Sap kan ngaihsang ang chiah kha niin ka hria. Min zahin min ngaisang em em a, min hmuh an duh a, kan bula awm erawh an zak tlat thin. Thil hi ti thei vek turah min ngai ni berin ka hria. Biakin mamawh engpawh hi Ka Pu chu chu min pe rawh aw an ti a, min dil mai zel a ni.

Biakin kan hawng: Kan hotuten min lo hrethiam se, Biakin pawh hawn nghal an duh a, kal vel a harsat bawk avangin hawn chu a tlu ta a. Dt 20th February 2011 (Sunday) chuan zingah Simalung Biakin kan hawng a, ribbon aiah rangva kan chep sin a, rangva chehna in kan chep chhum ve ta a ni. Biakin kan han lut chu Thlarau Thianghlim a lo che ta tlat mai. Halleluiah leh Amen nen tawngtai pawh a tawp hlei thei lo.....An khua a Biakin hmasa ber a ni a, Lalpan a luah nghal a ni. Lalpa chu fakin awm rawh se. Chaw ei khamah (sana an neih ve loh avangin dar bi tukin awmzia a nei ve lo) Chhotagongrai Biakin kan hawng ve leh ta a, hetah hi chuan La phiar chi, lazai sen-2 hi kan thlung ve a, bak cheh ni loin chem lukun in kan zai chat ve thung. Biakin ah chuan ka khat nghal tlat a, kan hlim hle mai. Biakin tha tak hawn a han ni chu kan lawm tlang hle a, mittui nen Pathian kan fak tak meuh a ni. An zai te hi an zai mai mai lo, an zai tak tak a ni. Mitdel, thawmhnaw chhe tak ha a tlar hma

bera thu chu uar em em a zai in a phar a, mitthlaah a cham reng a ni. Pathian a ropui a, Biakin chu Pathian thlarauin a luah tlat a, hlimnain a khat a ni.

Pawlah mi-4 kan lawmlut a, nau-2 kan hlan bawk. An harsat em avangin nau tuamna puan an nei chuang lova, tuam lohin kan hlan tawp mai a, rilru a khawih takzet a ni. Inkhawm ban chuan chana tui nei lo-a chhum chu kan sem tir ve a, changel hnahah an rawn dawh thliah thliah a, hlim takin kan ei ho ta a ni.

Kan haw dawn chuan naupang, thalai leh nu leh pa te chu min thlah turin an rawn chhuak hlawm a, mahse, kan thlang lawkah chuan pumna awm a, min rawn ko ta tlat mai. Kan zuk kal chuan mitdel monu naupai a lo ni a, lei chhuat lawngah na ti em em hian a lo mu a, a pasal chu lei chhuatah chuan thuin a mal a lo lukham tir a, kan han hmu chu kan lainat bawk a niang kan dawm nghal chat a, a sirah chuan an pa ber (mitdel) kha chhuat lawngah a lo mu ve bawk a, ani hi chuan Gamchha chul rap tawh tet deuh hne hi a sin a, tawngtaina kan hman zawh chuan a ziaawm thu min hrilh a, (he hunah hian chhunglelam indona nasa tak a lo thleng a ni) kan tlan chhuak a, kan puanthuah tel chu kan phelh sawk sawk a, Pu Lalbiaka nen chuan kan sin lai chu kan zuk pe ta ringawt a, kan kal leh chu kawngka biang ngheng hian Pumna-i ngei khan kawngka biang nghengin min thlir zui vawng vawng a, “i dam tawh em ni” ka ti a, “AW” a ti mai chu ka van lawm em “Lalpa ka lawm e” ka ti mawlh mawlh a ni. A ni pawh chuan mittui nen min bye bye liam ve ta a. Tunah khuan Hindu te pawh in min belh an duh a, min thlir reng a ni, tan ila tlang ang u. Tunah hian anmahni enkawl turin Kraws Sipai Samuel-a dah a ni a, tanpui dan in ngaihtuah sak theih chuan a tha khawp ang.

TIHDIKNA

March 2011 Sipai Tlangau chhuak ah khan chhutsual palh a awm a, phek li para 3 tlar 9 naah ‘sumdawng’ tih kha pawl’ tih tur a ni a. Tih sual palh liau liau a ni, chhiar tuten min lo hrethiam dawn nia.

Editor/-

Sipai Tlangau March 2011 phek 9 na, engvanga Sabbath serh ta lo nge kan nih tih sawifiahna para hmasa berah thlarau lam chaw kan dawn na hun a tan ‘Isuan’ tih kha ‘Paulan’ tih zawk tur a ni e. ziah sual palhah ngaihdam ka han dil e.

Major K. Lalrinawma

T.S.A.Y CONGRESS 2011

**THENZAWL, MIZORAM A KHAW
HMUNNUAM TAK, PI PUTE SULHNU
LEH HMUN HMINGTHANG TAM TAK
AWMNA AH T.S.A.Y CONGRESS**

Ni 28th - 30th October, 2011

**CHHUNG HIAN NEIH A NI DAWN,
CORPS/SOCIETY-A S.A.Y. MEMBER
ZAWNG ZAWNGTE KAL VEK TURIN
TUN ATANGIN I INBUATSAIH ANG U**

Territorial Youth Secretary, IET

IET Editor in Blog thar nei

Kan Periodicals leh Weekly news te hmun hla zawka awm ten awlsam taka an lo chhiar ve theih nan IET Editor chuan Blog thar a nei a. He Blog visit duh tan hetiang hi a ni e, 'www.ieteditor.weebly.com'. He Blog hi duhthusam a peihfel la ni chhiah lo mahse a duh tan chuan tlawh theih in a awm ta e.

SIPAI TLANGAU

REGISTERED

Postal Regd. No. MR-NE 1063/2009-11

Valid upto 31 Dec. 2011

BOOK POST

To _____

Published by the Territorial Headquarters, The Salvation Army, India Eastern Territory PO Box - 5, Aizawl - 796001, and Printed at The Salvation Army, Centenary Press, Tuikual 'S' Aizawl, Mizoram
email : IET_Editor@salvationarmy.org
chawnghluna@gmail.com